

現代生活藝術系列

華嚴經疏論纂要 29

— 升須彌山頂品

華藏淨宗學會印贈

大方廣佛華嚴經疏論纂要卷第二十九

五臺山清涼國師澄觀疏鈔

太原方山長者李通玄 論

閩鼓山私淑比丘道霈纂要

升須彌山頂品第十三

○將釋此品四門分別初來意

〔疏來意者〕先辨會來前信此解。義次第故。又答十住問。總有二段。前信是住之方便。此明正位。故次來也。二品來。前品說信究竟。此品趣後說住。故次來也。

○二釋名

〔疏〕釋名者。亦先辨會名。約處。名。初。利天會。約人名。法慧菩薩會。約法。名。十住會。皆依主釋。二品名。須彌。正云蘇迷盧。此云妙高。如來以自在力。不起覺樹。應機現彼。故云升也。表位漸增。不處人間。顯位清淨。故居天也。若天表淨。何獨妙高。妙有十義。如於法故。一者體妙。謂四寶所成。二者相妙。謂八方四級。三者色妙。謂四正色。北金東銀。南吠瑠璃。西頗胝迦。一切草木鳥獸等物。隨所至處。則同其色。自常不變。四者德妙。謂八方猛風。不能令動。五眷

屬妙。謂七金山。七重圍繞。及七香海。海印旋流。六
 依持妙。唯天依住。得通者居。七作業妙。不離本處
 而鎮四洲。暎蔽日月而成晝夜。八生果妙。謂波利
 質多。能益天衆。九爲首妙。於泗洲地。最在先成。十
 堅固妙。於輪圍中。最在後壞。高者。高八萬四千由
 旬。入水亦爾。下據金剛。上隣空界。頂上縱廣。量亦
 如之。獨出九山。故稱高也。金謂波利者。波利此云
 編也。亦曰周匝。質多羅
此云間錯。莊嚴謂此樹衆色。雜華。周匝莊嚴。或云
 圓妙。莊嚴卽俱舍園生樹也。故俱舍云。東北園生
 樹。西南善法堂。論釋云。其園生樹。盤根深廣。五十
 踰蹠那。聳幹上升。枝條旁布。高廣量等。百踰蹠那。
 挺葉開華。妙香芬馥。順風薰滿。百踰蹠那。若逆
 風薰。猶徧五十。是諸天衆遊樂之所。餘文可知。十

住之行亦復如是。聞思修解而爲妙體。四德八聖以爲妙相。四辯爲色。令物解同。雖同衆音。自智不變。八法不動而爲妙德。七支奉戒。金山圍遶。七識流轉而爲海印。第一義天。依持而住。可以神會。非情能升。不離本處。徧應十方。暎蔽佛日。及菩薩月。而成涅槃。生處晝夜。生教行果而爲妙樹。世界初成。菩薩先出。爲衆生現種種資具。世界將壞。菩薩後沒。爲說上定。令免三災。高者具成八萬四千諸度法門。自在障外。爲衆生故。人生處海。亦具八萬四千諸度法門。據金剛性。隣勝義空。又智入佛慧。

必窮其底。德超方便。迥出羣峯。爲顯十住功德。妙高。是故須升妙高山頂。四王處半。旁而非正。表住不退。異信輕毛。故越彼天。居妙高頂。善財童子於妙峯山頂。見德雲者。亦表斯位。彌顯有由。然上所釋。皆圓教意。故下發心品云。應知此人。卽與三世諸佛同等。與三世佛功德平等。得如來一身無量身。纔發心時。卽爲十方一切諸佛共所稱歎。不可同於方便教說。若觀心妙高者。謂三昧須彌。寂然不動。無思無心。不收不攝。任性而定。稱本心地。入佛智海。湛然不遷。是妙法樂。觸境自在。合本性淨。

是四德寶而自莊嚴。斯則本覺如來。升法須彌之頂。

○三宗趣

〔疏〕宗趣者。先約會。以十住行德爲宗。攝位得果爲趣。二品以嚴處請佛赴感爲宗。根緣契合說法爲趣。

〔論〕此十住位中有六品經。一升須彌頂品。二頂上偈讚品。三十住品。四梵行品。五發心功德品。六明法品。如是六品共成十住法門。將釋此品義分爲三。一釋品來意。二以處表法。三隨文釋義。一釋品

來意者。明前於普光明殿人間地上。成十信之心。已終。此妙峯之頂。明從十信入十住。入位之升進。故此品須來。二以處表法者。明此山於七重金輪圍山。七重大海之內。出水高八萬四千由旬。縱廣亦爾。四寶所成。東面黃金。西白銀。南吹琉璃。北瑪瑙。上有四埵。埵有八輔。天衆四八三十二。中心名妙高頂。天帝釋在其上。居寶宮殿。通爲帝釋天。三十三天。總以帝釋爲主。帝釋有四名。一名天帝釋。二名憍尸迦。三名釋提桓。四名因陀羅。大意名能主。爲能爲諸天作主故。此妙峯山。四寶合成。諸天

寶宮殿。在上莊嚴。故爲妙峯山。此山之外。七重金山。及七重大海。廣量金翅鳥兩翼相去三百三十六萬里。迅疾能飛。一鼓翼萬萬九千里。七日七夜。方至其頂。其山在大海之中。形如鬻鼓。峯然高聳。非以手足攀攬之所能登。爲表此十任法門。創生如來智慧之家。爲真佛子。不可以有生滅尋思觀。察。及多聞心想攀攬所得。故以妙峯山。用況表之。令後人做學。山者。高勝義故。像此十任。任佛所任。法身妙智慧海故。是出世高勝義故。妙峯山者。不動義。諸天所居。妙樂義。莊嚴義。像此位菩薩。以方

便三昧寂然不動。無思無心。不收不攝。任性而定。稱平等理。與法身合。忽然妙慧從此定生。無始無明。總無所得。任佛妙慧。都無所依。得法妙樂。智慧莊嚴。出過情見。諸佛所說解脫妙經典。無不解了。爲生在如來智慧家故。三界無明。一時頓盡。唯有習氣煩惱。漸漸以法治之。如下十任品云。佛子。菩薩住處廣大。與法界虛空等。佛子。菩薩住三世諸佛家故。又如初發心功德品云。應知此人。卽與三世諸佛同等。卽與三世諸佛如來境界平等。卽與三世諸佛如來功德平等。得如來一身無量身。

究竟平等真實智慧。纔發心時。卽爲十方一切諸佛所共稱歎。乃至震動一切世界。及一切世界中。示現成佛等。如文廣明。不可同於三乘方便教說。地前三賢菩薩。得折伏現行無明。地上見道。爲此經法教門。依一切諸佛根本不動智而發心故。以乘如來一切智乘而發心故。於此十住位中。能與如來同智慧故。不同三乘。但將三空觀。且折伏現行。於此經中發心之者。從佛不動智而發菩提心。設有餘習。還以無依住智治之。還是根本智。不伏不斷。爲本寂用自在故。無體可斷故。無可伏故。設

修三昧。任性淨故。亦無收攝。亦不伏捺故。任自淨
故。設行分別。任性智慧。隨事用爲。亦無取捨故。如
是任法調治習氣。使稱理智。令慣習增明。如佛願
行。而隨事世間。成長大悲。出不沒故。以心境一
真。無出沒故。是故經中以阿修羅王等表之。處大
海而不出不沒等喻。問曰。何故不升四天王宮而
超至帝釋宮。答曰。爲四天王在妙峯山半傍住。非
是可表升法頂處。至相盡現智慧莊嚴住。不退故。
善財童子於妙峯山。得憶念諸佛智慧光明門。同
此位故。准例可知。以超情塵之跡。以山表之。非要

登山也。已入如來智慧於衆中。堪爲王導。故非要爲帝釋也。三釋文如下。

○四釋文者。此會六品。分爲二分。初二品。方便發起。後四品。當會正說。前中初之一品。唯是由致。偈讚一品。義有兩兼。一是方便。謂前品化主赴機。後品助化讚佛。主伴圓備。方演法故。二是所依。謂三天說法。各有偈讚。欲顯三賢。皆依佛智。有差別故。離如來智無自體故。獨爲方便。甚抑讚詞。行向二會。同此科判。今初一品。長分十段。一本會齊現。二不離齊升。三各見佛來。四各嚴

殿座五皆來請佛。六俱時入殿。切樂音竝止。八各念昔因。九同讚如來。十殿皆廣博嚴淨也。今

初。○十段科中。皆有皆俱齊等言者。以約結通。周法界故。

爾時如來威神力故。十方一切世界。一一四天下。閻浮提中。悉見如來坐於樹下。各有菩薩承佛神力而演說法。靡不自謂恒對於佛。

〔疏〕言爾時者。卽前二會時。主伴齊徧。演前二會之法也。何須舉此。欲明前會不散。成後會故。後必帶前。合成法界無礙會故。一一諸會。無休息故。後後諸會。皆同時故。若散前會。卽無後故。所以唯約覺

樹會者。此爲本故。得佛處故。理實第二。亦同此徧。若同時徧。何有九會前後。若有前後。何名同時。應云。卽用之體。同時頓徧。卽體之用。不壞前後。猶如印文。

○第二明不離覺樹。各升釋天。

爾時世尊。不離一切菩提樹下。而上升須彌。向帝釋殿。

〔疏〕問。動靜相違。去住懸隔。旣云不離。何得言升。古有多釋。一云。本釋迦身。不起道樹。別起應化。以升天上。二云。不起是報。升天是化。一云。不起是法身。

升天是化用。並非文意。以此文中。俱是毘盧遮那
 十身雲故。鈔古有多釋下。次敘昔順違。昔有五義。
 第五。以初三師並約三身。義類大同。欲併破故。先
 敘於昔。並非文意下。二辨違通。有二違。一違現文。
 去任皆是遮那佛故。二違經宗。十身非
 二三身故。彼即是後二會。此即今文也。一云。以去
 即非去。故名不起。非去即去。是以升天如不來。相
 而來等。若爾。但是升相離故。非是樹下別有不起
 之身。故不可也。一云。以去者。二敘第四師。以不分
 理無礙。宗中之意。不
 違大體。不順今文。有云。此佛神通。同體業用。即
 任是去。去即任。任是體徧去。是用應。應是體應。
 離升後而不離前。體是應體。雖不離前而升後。若

爾何殊第三師不起是法。又以住釋於不起而言。住是體徧。何得獨住菩提樹耶。升天何得非體徧耶。菩提樹下。寧非吊耶。今顯正義。然佛得菩提。智無不周。體無不在。無依無住。無去無來。然以自在卽體之應。應隨體徧。緣感前後。有住有升。閻浮有感。見在道樹。天宮有感。見升天上。非移覺樹之佛。而升天宮。故云不離覺樹而升釋殿。法慧偈云。佛子汝應觀。如來自在力。一切閻浮提。皆言佛在中。此不離也。我等今見佛。住於須彌頂。此而升也。文理有據。更以喻顯。譬猶朗月。流影徧應。且澄江一

月。三舟共觀。一舟停住。二舟南北。南者見月千里隨南北者。見月千里隨北。停舟之者。見月不移。是爲此月不離中流而往南北。設百千共觀。八方各去。則百千月各隨其去。諸有識者。曉斯旨焉。古德釋此畧有十義。一約處相入門。以一處中有一切處故。是故此天宮等。本在樹下。故不須起。然是用彼故說升也。二亦約相入門。以一處入一切處故。樹徧天中。亦不須起。欲用天宮表法升進。故云升也。三由一切卽一故。天在樹下。四由一卽一切。樹在天上。不起等準前。五約佛身。謂此樹下身。卽滿

法界徧一切處。則本來在彼。不待起也。機熟令見。故云升也。是故如來以法界身。常在此。卽是在彼。六約佛自在。不思議解脫。謂坐卽是行。住等。在此卽在彼。皆非下位測量故也。七約緣起。相由門。八約法性融通門。九約表示顯法門。十約成法界大會門。然此十解。前五玄門。次四所以。後一總意。欲成十義。相參而立。雖似雜亂。不違經宗。竝可用也。問。帶前起後。事理應齊。何故三賢獨有斯旨。答。顯異義故。謂初二會相隣接故。不假帶前。此三人天隔越。故須連帶。又此三會同詮賢位。六已入證。不

假帶前。第七卽位中。普賢居然不假。第八頓彰五位。體用已融。第九唯明證入。體用一味。故竝皆不假。

○第三明各見佛來

時天帝釋。在妙勝殿前。遙見佛來。

〔疏〕約佛。則用從體起。約機。則境從心現。隣而未卽。故云遙見。

○第四各嚴殿座

卽以神力莊嚴此殿。置普光明藏師子之座。其座悉以妙寶所成。十千層級。迥極莊嚴。十千金網。彌覆其

上。十千種帳。十千種蓋。周迴間列。十千繒綺。以爲垂帶。十千珠璣。周徧交絡。十千衣服。敷布座上。十千天子。十千梵王。前後圍繞。十千光明。而爲照耀。

〔疏〕表嚴根欲之殿。爲法器故。置師子座。表十住之法門故。文有十句。初總餘別。總云。普光明藏者。此是解位。智照法空。含衆德故。從信始入。故有置言。別中。初句約體。餘並顯嚴。皆云。十千者。萬行。因感故。言層級者。萬行熏成。故金網防護。慈悲帳蓋。以育以覆。四攝繒綺。以爲周垂。圓融行願。交絡萬善。柔忍慚愧。以覆法空。第一義天。清淨梵行。繞斯法。

體。一智照。故曰光明。於生歿中。遣長夜暗。舉斯果德。令物行因。下行向中。約位漸增。表法無異。

○第五請佛居殿

爾時帝釋。奉爲如來敷置座已。曲躬合掌恭敬向佛。而作是言。善來世尊。善來善逝。善來如來。應正等覺。唯願哀愍。處此宮殿。

〔疏〕於中三業崇敬。以爲請儀。言善來者。應機來故。不來相而來故。帶法界會來故。二稱善者。喜之至故。舉三號者。畧歎德故。願哀處者。希仗勝田。生大福故。

○第六俱時入殿

爾時世尊。卽受其請。入妙勝殿。十方一切諸世界中。悉亦如是。

〔疏〕謂根緣契合。成益不虛。十方如是。通上六段。入殿事訖。故一結通。下四段文。殿中之事。

○第七樂音止息

爾時帝釋。以佛神力。諸宮殿中所有樂音。自然止息。〔疏〕謂攝散歸靜。得定益故。

○第八各念昔因獲智益也

卽自憶念過去佛所種諸善根。而說頌言。

〔疏〕散緣既止。勝德現前。寂然無思。發宿住智。種善根者。卽下十佛。曾入此殿。聞法供養故。亦表見自心性。同昔佛故。

○第九同讚如來

迦葉如來具大悲

諸吉祥中最無上

彼佛曾來入此殿

是故此處最吉祥

〔疏〕然三世諸佛。皆於此處說十住法。獨讚十者。表說十住。及無盡故。所以讚者。義乃有四。一十佛會處。則殿勝可居。二互舉一德。例讚本師。三敘昔善根。慶遇堪受。四昔佛同說。表法常恒。文中先明此

界。後辨結通。今初十頌。各上半標名讚德。上句別。下句通。下半以人結處。唯初一句。諸佛不同。然佛別名。多因德立。讚者取德。以釋上名。初迦葉者。此云飲光。若從姓立。示生彼族。若就佛德。一者身光。蔽餘光故。二者悲光。飲蔽邪光故。

拘那牟尼見無礙

諸吉祥中最無上

彼佛曾來入此殿

是故此處最吉祥

疏拘那牟尼。舊曰金仙。亦云金寂。寂故無礙。金故明見。

迦羅鳩默如金山

諸吉祥中最無上

彼佛曾來入此殿

是故此處最吉祥

〔疏〕迦羅鳩馱者。具云迦羅鳩村馱。此云所應斷已。斷如金已淨。如山不動。亦可見無礙者。是此佛德。如金山者。是前佛德。

毗舍浮佛無三垢

諸吉祥中最無上

彼佛曾來入此殿

是故此處最吉祥

〔疏〕毘舍浮者。亦云毘溼婆部。毘溼婆者。此云徧一切也。部者。自在也。亦云徧勝。無三垢故。無不自在。而超勝也。三垢。現種。及習。

尸棄如來離分別

諸吉祥中最無上

彼佛曾來入此殿

是故此處最吉祥

〔疏〕尸棄亦云式棄那。此云持髻。亦云有髻。無分別智。最爲尊上。處心頂也。又髻中明珠。卽無分別也。

毗婆尸佛如滿月

諸吉祥中最無上

彼佛曾來入此殿

是故此處最吉祥

〔疏〕毘婆尸者。此翻有四。謂淨觀。勝觀。勝見。徧見。如月圓智滿。是徧見也。鬼盡惑亡。是淨觀也。旣圓且淨。是勝觀勝見也。

弗沙明達第一義

諸吉祥中最無上

彼佛曾來入此殿

是故此處最吉祥

〔疏〕弗沙亦云勃沙。此云增盛。明達勝義。是增盛也。

提舍如來辯無礙

諸吉祥中最無上

彼佛曾來入此殿

是故此處最吉祥

〔疏〕提舍亦云底沙。西域訓字。底邏那。此云度也。沙是皤沙。此云說也。謂說法度人。或但云說。辯才無礙者。卽能說也。

波頭摩佛淨無垢

諸吉祥中最無上

彼佛曾來入此殿

是故此處最吉祥

〔疏〕波頭摩者。云赤蓮華。身心如蓮華。淨無塵垢。

然燈如來大光明

諸吉祥中最無上

彼佛曾來入此殿

是故此處最吉祥

〔疏〕然燈者。智論云。此佛從初現生。乃至成佛。舉身常光。如然燈故。身智光明。普周稱大。然十中後七。乃過去劫佛。如何賢劫。曾入殿耶。古釋有二。一約時劫相。卽入故。二約其處。有麤細故。麤隨劫壞。細者常存。如法華。天人見燒我土不毀。又梵王見淨。身子見穢。今此天帝。是大菩薩。同梵王見。亦佛加故。

如此世界中。忉利天王。以如來神力故。偈讚十佛。所有功德。十方世界。諸釋天王。悉亦如是。讚佛功德。

〔疏〕二結通十方。可知

○第十殿皆廣博。卽示如意相

爾時世尊入妙勝殿結跏趺坐。此殿忽然廣博寬容。如其天衆諸所住處。十方世界悉亦如是。

〔疏〕廣殿同處。以遣局情。亦表廓大慈悲等衆生界。又如來入殿。卽覺智現前。忽然廣博。則身心無際。十方已下。通結無盡。唯結後四。前已結故。

〔論〕隨文釋義者。云不離菩提樹者。明菩提體。無去來遠近處所。可離可到故。又如來智身無表裏體。徧周故。又法界非大小。毫利相容故。又心境無二。

相。無中邊方所故。又諸法無自性。一多恒圓滿故。帝釋遙見佛來者。有二義。一事。二表法。一事者。爲如來於無去來性。示去來之相。故言遙見。二表法者。明帝釋示同未悟。不見如來智身徧周。與心一體。故言遙見佛來。又信解爲遙見。自心入位爲佛來。帝釋卽以神力莊嚴此殿者。亦有二義。一事。二表法。其事可知。二表法者。自加行也。安置普光明師子之座者。亦有二義。一約位置座。二約帝釋自德根堪。一約位置座者。約此十位中法位也。爲十住中。得一切諸佛智慧光明之藏。於一切法自

在無畏。故置此座。如十行位中。於夜摩宮中。化作寶蓮華師子之座。此約行位。在一切生處。具大悲。行萬行。以理智體得無染。故以是義。故以蓮華爲座體。在此十行位中。以得一切諸佛智慧光明。普照萬法。故安置普光明藏師子之座。此十在中安置其座。十千層級。十行中。化作百萬層級師子之座。爲十行位中。初始入位。明須彌之上。猶連地居。明心有所得。從信創會見法之報。以此義。故師子座須有安置。又方便三昧。是安置故。十行位中。約十位中。理智妙慧功成。卽十行位中。以妙用而

化其座又約行。從空而立。還約位在夜摩空居之天。云座十千層級。又百萬層級。及帝釋天宮。夜摩天。總明隨位升進行相。若也正入法智慧流。不出毫塵。徧諸刹海。其座乃至十廻向十地。高下嚴飾。各各隨位不同。准例知之。其座上莊嚴皆十千者。明萬行報得故。令發心入位菩薩。識果行因。無疑惑故。從曲躬已下。明帝釋於如來致敬。請佛入宮。明行謙行也。如來受請。明從信入任。如文可知。帝釋得宿念力於過去佛所種善根。說頌歎佛者。明以三昧力。自見身心體性同古今佛智慧善根故。

已下十佛。是當位之功用合古也。前之三佛。是此
今賢劫中佛。後之七佛。是前劫中佛。以明創入十
住之門。古今法則相會。明古佛今佛。法不異故。入
此位者。會同不別故。言吉祥者。歎此山頂。是福善
之處。故明升進者。以三昧力。身心不動如山王。總
會古今諸佛同智慧故。如此世界中。忉利天已下。
有四行經。於中義分爲四。一舉此世界歎佛功德。
二總舉十方同然。三爾時已下。明如來入殿升座
而坐。四明其殿忽然廣博。普容諸天住處。此明約
如來無自他之德。合然令大衆得見。以明令大衆

入位同此。已上釋升須彌品竟。大約此明以三昧力。正入定時。身心蕩然。稱法界性。無表裏。光明朗徹。是忽然廣博義。亦是普光明藏師子之座義。智慧現前。是佛來義。一一如是會理修行。不可但逐名言也。升須彌山頂品竟。

甌寧縣吉陽里忠義坊信女趙門謝氏順娘。法名太蓮。捐貲刊刻華嚴經升須彌山頂品疏論纂要第二十九卷。伏願植一乘之真種。轉五漏之微軀。現生命運。昌隆當來靈苗。增秀康熙己未年十一月。華藏室謹題。

大方廣佛華嚴經疏論纂要卷第二十九